

5. Deum semper in omni cogitatione, verbo, et opere, quounque alio fine excluso, respice : et unicam ejus voluntatem sectare. Nunquam à recto trahite deviat, qui Deum sibi viæ ductorem proponit. Bono loco res tuae erunt, si omnia quoevere facis ad Dei gloriam dirigas; atque ita singula facias, ac si ipse spectet, qui videt omnia, omnia sustentat, omnibus providet. Ejus obtutum nunquam effuges : interest enim non verbis tantum et factis, sed intimis cogitationibus tuis. Cùm fore obduxeris, et tenebras intus feceris, ne putas te solum esse ; tecum Deus est, qui secretum tuum facere sanctius debet, cui nihil clausum est. In ipso vivimus, movemur, et sumus. Coram illo comedere et bibe, cum illo ambula, cum eo tracta negotia tua, ad ipsum erige vitam tuam. Fac te dignum, in quem oculos figat, quem semper amabiliter spectet. Magna tibi necessitas indicta est probitatis, cùm antè oculos agis Judicis cuncta cernentis. Sic vive, ac si nemo in mundo sit, præter te solum et Deum. Quicquid ejus providentia de te disposuerit, libens amplectere, sive prosperum illud fuerit, sive adversum. Deum quæris : hác, an illà vià ad ipsum pervenias, quid refert? Atque utinam aliquando pervenias!

CAPUT XX.

DE BONO SOLITUDINIS. FUGIENDA MALORUM SOCIETAS.
MUNDI VITIA QUOT ET QUÆ SINT. STUDIUM PROFICIENTIS,
ACQUISITIO VIRTUTUM. SIGNA QUÆDAM OBENTAE
VIRTUTIS.

4. Ingens argumentum est compositæ mentis, et à pravis affectionibus emendatæ, secum posse consistere. Sicut Deus, se solo beatus, in se semper moratur ; ita ad Dei felicitatem proximè accedes, si tecum manere didiceris. Et quidem si volueris, nunquam eris solitarius, si nunquam à Christo separaberis. Quod si loquendi te corripit cacoëthes, tecum loquere ; sed cave, ne cum malo homine loquaris. Vis autem scire, quid tecum colloqui possis ? Id quod homines de aliis libertissime faciunt : de te apud te male loquere. Produc vitia tua, et castiga quicquid in te animadversione dignum repereris. Nunquam deerit aliquid vitium, cui curatio adhibenda sit. Absconde te in otio ; sed et otium tuum absconde. Gloriari solitudine, iners ambitio est. Corporali autem solitudine internam juge, ut grata tibi atque utilis sit. Subdue te vanis occupationibus ; nec ab hominibus tantum, sed à rebus etiam secede, quæ ad te non spectant. Esto liber ab omni creatura ; et à corde tuo earum imagines exclude. Abjice omnes caducarum rerum sollicitudines, omnes cogitationum ineptias ; et in abdito cordis recessu tibi soli, et Deo attende. In hoc

mentis silentio, in hac rerum omnium oblivione et nuditate, vera cordis requies, vera tranquillitas sita est. Huc fuge, hic abscondere, hic semper intende: ibi enim reperitur Deus, ubi omnes creaturæ deseruntur.

2. Si vis bonus esse, fuge malorum consortium. Nihil tam damnosum bonis moribus, quam se populo committere. Nunquam mores, quos intulisti, referes. Animus tener et parùm tenax recti, virtutum impetum, tam magno comitatu venientium, ferre non potest. Facile transitur ad plures. Con-victor delicatus paulatim enervat et emollit: vici-nus dives cupiditatem irritat. Unico exemplo luxuriæ, seu avaritiae, perire potes. Trahunt in pravum parentes, trahunt socii, trahunt servi. Plena omnia periculis, plena sunt laqueis. Statim ac editi in lumen sumus, in omni continuò pravitate, et in summâ opinionum perversitate versamur. Vix ullus in mundo est, qui non aliquod vitium aut commendet, aut imprimat, aut nescienti allinat. Continebis te aliquando inter domesticos lares: extra forum et commercium hominum: proh quam suavi et optatâ fugâ! Omnia intus serena, omnia tranquilla, sine nube et vento. Accedit casu qui te evocet; sequeris. Conjungunt se alii, sit corona, veniunt ad turbam, peccatur multiplici excessu; et qui bonus exieras, pessimus regredieris. Vulnera autem animæ non deprehendis, nisi iterum solitarius. Recede ergo in te ipsum, quantum potes, ne suis erroribus mentem imbuat omnis undique ad vitia consentiens multitudi. Lætior est animus, qui in pauciora distinguitur.

3. Crède tē paulisper in celsi montis verticem subduci: speculare indè miserrimam mundi faciem. Hinc disces ipsum odisse, et ab eo in solitudinem elongari. Cernes itinera à latronibus claudi, maria à praedonibus obsideri, fremere undique bella, et humano cruento madescere campos, abruptoque fræno vitia ubique et scelera dominari. Videbis in occulto penetrali ab impudicis ea fieri, quæ nec ipsis quidem possunt placere qui faciunt. Invenies tam indigna, tam indecora; ut nemo dubitaturus sit eos insanire, si cum paucioribus insanirent: sed sanitatis patrocinium est insanientium turba. Inter leges ipsas delinquitur; nec tuta illic est innocentia, ubi defenditur. Perit innocens, absolvitur reus: minusque criminis, quam absolutione peccatur. Nullus legum metus est: quod enim potest redimi, non timetur. Amaræ sunt obloquentium linguae, subdola ora laudantium: indè saevit odium, hinc decipit mendax officium. Alius vino madet, aliis torpet inertia. Illum insatiabilis avaritia tenet; hunc defatigat ex alienis judiciis suspensa semper ambicio. Respic forum multitudine refertum: tantumdem istic vitorum esse fateberis, quot hominum. Peccant omnes injuriis in proximum; in Deum contemptu, in res abusu: omnia in suum congregant judicium, omnium rei. Et quomodo tutum servare vestigium, vel ad te recurrere poteris, inter tot vitia omni ex parte argentia, quæ resurgere cupientem, et in altum attollere oculos, premunt, et mergunt? Innoxium aliquem esse, ubi regnant nocentium agmina, difficile est: nam si te immutare non poterunt, saltem impedian. Una est firma

tranquillitas, tot te malis excerpere, et in eam recedere stationem, è qua possis mundi luem ab omni contagio liber intueri. Insuperabilis est animus, qui externa deseruit, et sibi soli vacans arce suà se vendicat. Huic mundus carcer est, et solitudo paradius.

4. Vanum est ab hominibus secedere, nisi cogas animum intentum sibi esse, et virtutum exercitationi solerter incumbere. Nullum homini bonum est, si desit virtus; nulla quies, nulla felicitas, nisi ex virtute. Tria sunt, quæ sibi mutuo in Universo respondent. Inter omnia et super omnia Deus; inter sensibilia lux, inter animi perfectiones virtus. Deus est lux et virtus omnium: lux, virtus mundi et imago Dei: virtus, lux animi, per quam filii Dei nominamur et sumus. Ad hanc purgato animo accedere debes, si ad optatum perfectionis culmen pervenire desideras. Virtus enim perfectio hominis est, instauratrix innocentiae, omni plena jucunditate. Est supplementum naturae, ad bonum supernaturale ex se ineptæ. Est facilitas boni operis, quæ recte vivimus, quæ velut cæci illuminamur, quæ peccatis resistimus, quæ meritis cumulamur, quæ vitam æternam promeremur. In hoc studio necessarium tibi primò est, cujusque virtutis naturam et actus præscire; quia nemo amat quod ignorat. Tum ab actu et exercitatione nunquam cessandum: et si desint occasiones, milites imitari oportet, qui in mediâ pace sine hoste decurrunt, fictisque velitationibus se ad vera certamina parant. Finge tibi conscientia quæque scelera objici: puta te contumelias proscendi, omnia quæ possides à te violenter au-

ferri; et sic patientiam exerce, ac si res vera ageatur. Non trepidabis in ipsa re, si antè rem te ita exercueris. Magnos ad pugnam spiritus adfert miles, qui sanguinem sæpè fudit.

5. Virtutum habitus non nisi longa exercitatione comparantur. An verò aliquam ex illis obtinueris, ex his indiciis dignoscas. Si nimurum vitia virtuti opposita extincta sentias, aut magnâ ex parte compressa. Si pravarum affectionum motus sub fræno rationis legem pati, ac menti parere facilè compellas. Si actus virtutis absque difficultate, imò etiam cum delectatione exerceas. Si tepidorum dicta contemnas, plenaque spiritus libertate ad ea præstanta te exeras, quæ displicant imperfectis. Si pravos actus, ad quos anteā per habitum inclinabar, connaturali quodam fastidio abomineris. Se neque per somnium re aliqua turpi delectari, aut quidpiam injustum approbare videaris. Si ea satanas imitari, quæ in aliis laudas et admiraris; atque ab illis abstineas, quæ reprehendis. Si nullam culpam exiguum putes; omnemque imperfectionem, quantumvis minimam, studiosè vites, et observes. Si cùm vides vel audis, æquales tuos divitiis aut dignitatibus florere; nec invideas, nec perturberis. Si errores tuos ingenuè fatearis, cupiens ab omnibus corrigi et reprehendi. Si conscientiae testimonio contentus, bona opera in te ipso serves, et abscondas: rectè enim facti fecisse præmium est. Si studio denique virtutis sine intermissione incumbas: nam vera virtus nunquam torpet, sed semper in actu est.

CAPUT XXI.

DE VIRTUTIBUS THEOLOGICIS. FIDES OPERIBUS COMPROBANDA.
IN SOLO DEO PONENDA FIDUCIA. MOTIVA AMORIS ERGA
DEUM. AMOR PROXIMI BENEFICIIS OSTENDITUR. HORTATIO
AD ELLEMOSYNAM.

1. Basis cæterarum virtutum et totius Christianæ vitæ fundamentum est fides; sine quâ nemo potest placere Deo. Hæc est sapientia, quæ domuit orbem; cui firmiter adhærendum, omni disquisitione et cur ositare rejecta. Crede autem, et operare: quia Fides sine operibus mortua est. Sermo tuus, et professio tua jactitant Fidem: cave, ne vita et mores prædicent infidelitatem. Credis Evangelium: cur non obedis Evangelio? Credis vitam æternam: cur brevissimum tempus interminabili præfers aeternitati? Quid prodest credere vera et bona, si tu falsus es, et mala operaris? Vix fieri potest, ut benè credit, qui male vivit: ille enim verè credit, qui exercet operando quod credit.

2. Cum certissimum sit, Dei providentiâ omnia disponi et gubernari, adeò ut nec passer de cœlo, nec folium de arbore cadat absque ejus nutu et voluntate; ipsi te totum trade excelso animo, et ingenti fiduciâ, nihil dubitans, quin opportunum ad res omnes auxilium sis habiturus. Scito, omnia humana consilia atque præsidia fallacia et incerta esse; teque regi et agi absque ulla anxietate à Deo sinas. Et si res accident inopinatae, quibus actio-

MANUDUCTIO AD COELUM.

275

num tuarum et consiliorum tota series turbari et praecidi videatur, vel morbis, vel falsis criminibus, aliisque casibus gravioribus; ne despondeas animum, sed Spe Divinâ munitus, ejus te regimini subjice: nam per hos casus, per hæc discrimina, ad illum finem te Divina Sapientia perducit, quem tibi ab æterno destinavit. Non sentit malum præsens, qui futura sperat bona. Tantum potest homo, tantum habet, quantum sperat, et credit.

3. Charitas omnium virtutum forma et Regina, et Deum respicit, et proximum. Et Deus quidem ex toto corde, ex tota anima, ex totis viribus, super omnia amabilia diligendus est, purè propter se, et suam infinitam bonitatem. Quod est, quod vivis, quod moveris, quod sentis, quod intelligis, Dei gratia est. Ipse te à servitute diaboli redemit: ipse animam tuam innumeris prærogativis nobilitavit: ipse tibi vitam æternam, nullis præcedentibus meritis, præparavit. Cœlum, terra, aër, aqua, et omnia quæ in eis sunt, magnis vocibus quotidie clament, ut summo cum amore prosequaris, à quo propter te creatura sunt. Cur per multa vagaris, querendo bona animæ tuæ? Ama unum bonum, quod est omne bonum. Quære simplex bonum, quod est summum bonum; quo nihil majus, nihil amabilius potest excogitari. Solus amor est, quo mutuam Creatori vicem, quamvis non ex æquo, rependere potes. Amor autem non est otiosus; non querit quæ sua sunt: operatur magna, si est. Nulla amori impervia difficultas. Verus amator mori potest, vinci non potest.

4. Natura omnibus amorem indidit mutuum, et

sociabiles fecit: omnes enim homines magni corporis membrâ sumus, ad eamdem Fidem et gloriam vocati. Non amat Deum, qui non diligit fratrem suum. Actus verò dilectionis erga proximum sunt, beneficia omnibus conferre, omnibus prodesse, omnes obsequio et amore prævenire. Beneficia autem lœto animo et prompto indigentibus conferes, nullâ intercedente morâ, nisi in accipientis verecundiâ. Sufficiat ad remedium tristius quidpiam passis, quod eorum indigentiam scias. Molestem verbum, et onerosum est, Rogo. Si amici desiderium occupas, et antecedis, antequam rogeris, multiplicas munus tuum. Non tulit gratis, qui, cum rogasset, accepit. Si prævenire non potuisti, plura rogantis verba intercede, ne rogatus videaris; teque daturum, ipsâ festinatione approba, etiam si non fuisses interpellatus. Tum bona verba bonis rebus adjice; nec quidquam triste misceas beneficio, non mœstitiam, non tarditatem, non exp̄r̄ationem, non denique jactantiam. Res ipsa te silente loquetur; et qui videt in abscondito, redet tibi.

5. Inter actus Christianæ beneficentiae præciuum tenet locum eleemosyna; quâ fides probatur, redimuntur peccata, emitur cœlum. Cave ergo, ne despicias pauperem, qui cum sibi egenus sit, te facere divitem potest. Peccatis tuis venundatus es, redime te pecuniâ tuâ: fac de instrumento avaritiae, subsidium misericordiae. Histro te ad risum provocans, plenus à te recedit; Christus offerens regnum cœlorum, nihil accipiet? Tributa Principi vel invitus solvis, etsi ex agris nihil percepis;

Christo Regi ex eo, quod superabundat, frustum panis denegabis? Cave, ne parcens pecunii tuis, reus sis sanguinis fratris tui. Si non pavisti, occidisti. Cogitas, quâm benè alii post te vivant; non cogitas, quâm malè tu moriaris. Satius est deesse aliquid hæredibus tuis de patrimonio, quâm tibi de salute. Inspice rationes tuas. Vide, quid in æterna patria, quid hic possideas. Ex omnibus rebus tuis id solùm in morte reperies, quod per manus pauperum in cœlum præmisisti. Argue infidelitatem tuam. Invadere domum hostis potest, cœlum non potest.

CAPUT XXII.

DE PRUDENTIA. EJUS NECESSITAS, ET DIFFICULTAS. OFFI-
CIUM VIRI PRUDENTIS.

4. Ut architectis nullum opus rectè procedit sine linea, et libella; ita nec nobis sine prudentia. Hæc norma cæterarum virtutum est, recta ratio agendorum, oculus animæ, et ars vivendi. Non potest esse jucunda vita, à qua absit prudentia. Hanc artem difficillimam esse omnes fatentur. Sed et obscura est. Oritur ex eo difficultas; quod intrâ considerationis suæ ambitum res omnes tam universas, quâm singulares complectatur: ac deinde, quod nullus sit certus status rerum humanarum; quæcum sint variæ semper et contingentes, atque à diversis pendeant circumstantiis, non est cujusque ingenii, certam in illis statuere normam, et quæ

non rarò repugnantia sunt, certo quodam temperamento conjungere, et miscere. Obscuritatem vero adfert caligo illa, quā rerum gerendarum causā involvuntur. Apparet quidem earum fastigia; sed latent fundamenta. Latet etiam divinum decretum, de prospero vel infelici rerum eventu: unde fit, ut paucorum sit ista virtus. Pauci possunt quid magis expediat in quovis negotio praevidere.

2. Prudentiam gignunt usus, et memoria. Res enim singulares, quas illa regit, notæ h̄ mini fiunt per usum, et experientiam. Tutus eris, si tuo, et alieno credideris experimento; nec altiori rei te impones, in qua tibi tremendum, et unde cadendum sit. Ut vero omnia prudenter disponas, inspicere primū debes te ipsum; deinde negotia quæ aggredieris; tum eos, quorum causa, vel cum quibus agendum est. Et te ipsum quidem accuratè aestimabis, ne plus quam potes tibi posse videaris. Aliquis eloquentiæ fiduciā prolapsus est: quidam patrimonio suo plus imperavit quam ferre queat: alias infirmum corpus laborioso oppressit officio. Aestimanda sunt posteā quæ aggredieris; et vires tuæ cum rebus agendis comparandæ. Opprimunt onera, quæ ferente majora sunt. His quoque admovenda manus, quorum finem aut facere aut certè sperare possis. Hominum deinde delectus habendus est, an digni sint quibus partem vitæ tuæ impendas: eorum mores examinandi; nec tibi noceas, dum aliis prodesse studies. Denique considerandum est, utrūm natura tua rebus hujusmodi agendis idonea sit; et eō inclinandum, quō te vis ingenii defert. Reluctante naturâ irritus labor est.

3. Vir prudens nihil aggreditur, quamdiū aliquā perturbatione agitatur: non enim potest verum et honestum discernere concussa mens, et pravæ affectionis præstigiis delusa. Multum item prudentiæ adversatur præcipitatio, quæ in graves ac inextircabiles casus plerosque induxit. Quare prudens nil temerè agit, propriumque judicium alieno consilio subjicit. Timidæ sunt hominum cogitationes, incertæ providentiæ, rerum exitus dubii, fallaces experientiæ. Ibi salus, ubi multa consilia. Spectat quoque ad prudentem, rem denudare? et acutè introspicere, sine fuso et integumentis, quæ decipere incautos solent. Sepone pecuniam, famam, dignitatem: intus rem ipsam scrutare: quærid sit, non quid vocetur. Stultum est, simulacris et umbris falli. Tum debes veluti ex specula quidquid evenire potest explorare; ne stultum illud quandōque dicendum sit: Non putaram. Ad id longa consultatio adhibenda, maturumque judicium, et subtile examen; ne prava aliqua circumstantia actionem vitiet, ne prudentia degeneret in astutiam e calliditatem, et ne in tantâ veri ac fucati boni viciniâ vitium pro virtute amplectaris. Peractâ denique electione, omnem præcide moram, statimque exequere quod de revisti. Nullus cunctationi locus est in bono consilio; quod non potest laudari, nisi peractum.

CAPUT XXIII.

DE JUSTITIA, ET RELIGIONE. ACTUS UTRIUSQUE. QUID SIT
POENITENTIA, ET IN QUO CONSISTAT.

1. Justitia suprema virtus, aliis nata non sibi, quidquid habet transfundit in proximos, nihil petens ex se, nisi usum sui. Hæc homines à mutuis injuriis avertit, et mundum universum in pace constituit. Hæc tacita quædam naturæ conventio est, et vinculum societatis humanæ; nec quidquam sine illa laudabile esse potest. Vir justus neminem laedit, alienum non vindicat, omnibus prodest, benè de omnibus sentit et loquitur, dat unicuique quod suum est, non impedit alterius bonum. Si præsit, justa præcipit, omnibus patet, propriisque utilitatibus subditorum commoda præfert: pœnis vitia coërcet, præmia bonis largitur, et sic omnes contineat in officio. Si subsit, servat concordiam, legibus paret, et jussis majorum, suoque statu contentus officia et dignitates non appetit, nec se rebus ingerit quæ ad se non spectant. Gratis autem justitiam colit; quia justæ actionis nullum majus præmium existimat, quæ justum esse.

2. Religio moralium virtutum præstantissima, Deum immediatè respicit, ejusque cultum et honorem. Primus autem cultus est, ipsum credere et cognoscere: deinde, reddere illi majestatem suam, reddere bonitatem. Parùm est nosse Deum, quod et dæmones faciunt, qui oderunt: amor insuper et

cultus exigitur, his ex rebus constans; quæ utinam tam benè implerentur, quæ sciuntur! Scis, Deum illum esse, qui præsidet mundo; qui humani generis tutelam gerit; qui universa moderatur. Ipsum solum potentem, solum bonum, solum altissimum confiteris: ab eo tanquam à summo bono, et tuo ultimo fine, perpetuam beatitudinem expectas. Cur non igitur, ut par est, eum colis? cur non summam ei exhibes venerationem? cur vilissimam terre glibulam ei præfers? Vana est religio tua, nisi factis comprobetur. Vis verè religiosus esse? Ambula coram Deo, et esto perfectus. Satis eum colit, qui imitatur. Vera religio te Deo religat, Deum tibi. Custodi eam illibatam à negligentia, ab erroribus, à peccatis. Stultitia magna est, fidem linguâ, moribus infidelitatem prædicare. Hujus notæ homines irrisit olim celeberrimus inter Ethnicos Philosophus, dicens: Nihil gloriösus esse Christianis, cùm loquuntur: nihil miserabilius, cùm operantur.

3. Divini juris læsi reparatrix est Pœnitentia; quæ ad peccati detestationem inclinat, cum efficaci voluntate, Deo, per illud offenso, satisfaciendi. Hæc est enim pœnitentia, præterita peccata detectari, expiare; nec amplius in ea consentire. Præterit quod delectat; restat quod arguit, quod torquet, quod damnat. Quid prodest transactam fœditatem abscondere? Nemo nocens se judice absolvitur. Tribunal quoddam à natura in ipsa mente humana constitutum est, ubi unusquisque sui sceleris accusator est, et testis, et judex. Hic coge animum et sensus tuos quotidiè adesse, ad reddendam rationem. Dic apud te causam; et, quantum

potes, te ipsum coargue. Totum diem tecum seruare; omnia dicta et facta tua, atque ipsas mel cogitationes remetire, nihil abscondens, nihil transiens. Si agnoscis iniuritatem tuam, ignoscit Deus: si fateris, mederis. Quid refert neminem scire vi- tium tuum, cum tu scias? an utilius tibi existimas, damnatum latere, quam palam absolviri? Ubi cunque lateas, conscientia tecum est; non potes eam effu- gere. Miserrimus es, si hanc aspernaris.

4. In tria tempora vita dividitur, quod est, quod fuit, et quod futurum est. Præsens momentaneum est, antè desinens quām veniat? futurum nondum est: at præteriti dies aderunt omnes, cum jusseris, et ad arbitrium tuum se inspici patientur. Ne timeas memoriam tuam; ne erubescas te in præteritum retorquere, erroresque tuos tibi exprobrare. Quò frequenter id feceris, eò citius emendaberis. Ipse de te vindictam sume, nec ea iterum admittas, que fecisse te plangis. Plerique liberati à naufragio, exinde repudium et navi et mari dicunt, Deique beneficium periculi memoriā honorant. Hanc bonam sollicitudinem in te esse cupio; ne iterum experiri velis, quod semel timuisti. Grande periculum eva- sisti: ne te iterum discriminis exponas. Toties pe- percit Deus, quoties deliquisti: cave, ne idcirco deterior fias; quia Deus bonus est. Quid facturus sis, cogitas aliquando: cur non potius, quid feceris? Nam consilium futuri ex præterito venit. Multi ad sapientiam pervenirent, nisi jam putarent se per- venisse. Nisi te quotidie emendes, quotidie deterior eris.

CAPUT XXIV.

DE PIETATE, ET OBSERVANTIA. OBEDIENTIA COMMENDATUR,
ITEMQUE GRATITUDO. QUOMODO ACCIPIENDUM, ET RED-
DENDUM SIT BENEFICIUM.

4. Nulla vi verborum exprimi potest, quām laudabile opus sit, posse hominem dicere: Parentibus meis cessi, et parui semper: eorum imperio, sive æquum, sive durum fuerit, obsequenter et submissum me præbui: bonum patriæ civem me semper exhibui: fratribus et consanguineis benē facere nunquam cessavi: omnes vincere beneficiis conatus sum. Hac sunt nimurum Pietatis officia, quibus debitum tribuimus cultum patriæ, parentibus, fratribus, et aliis sanguine conjunctis. Quod vero pietas erga cognatos, id præstat observantia erga Prælatos, Principes, Præceptores, et alios, qui aliquo modo nos antecedunt dignitate, sapientia, ætate, religione, et sanctitate. Solemus enim coram illis assurgere, caput aperire, viā decidere, equo aut vehiculo desilire, ad genua provolvi, manus aut vestes osculari, aliaque honoris signa pro more patriæ exhibere. Hæc autem omnia profuso ac reverenti animo præstabitis, si præcesserit in intellectu magna sublimitatis illorum aestimatio. Nam hinc orietur in voluntate fuga quædam et metus, quo perculsus nimiam cum illis familiaritatem declinabis, atque ab eorum magnitudine in tuam quodammodo resiles parvitatem. Omnis potestas à Deo

est. Quicquid præstiteris majoribus tuis, infrà debitum honorem erit, si Deum in illis consideraveris.

2. Ut ex primi parentis inobedientiâ omnis calamitas exorta est, sic per obedientiam filii Dei ad felicitatem reducti sumus, si et nos obedientiam servaverimus. Obedientia rerum omnium perfectio est, earumque cum suo principio firmissima conexio. A Deo enim in Deum admirabili circu' euncta dedit. Hanc Christus præ cæteris virtutibus commendavit, qui ne eam perderet, perdidit vitam. Haec melior dicitur esse quâm victimæ, quia per eam propria voluntas mactatur. Suscipiendum est autem Superioris edictum, velut emissâ divinitus vox, nullâ quæsitiâ præcepti causâ vel motivo. Nescit judicare, qui perfectè didicit obedire. Moneat Superior, jubeat lex, dicat quid me velit facere; non disco, non dispculo, non excuso: sed simpliciter et velociter pareo, paratus ad omnia, seu facilia seu ardua, pari gaudio et promptitudine exequenda. Unum est, in quo refractorius et contumax esse potes, si quis nimirum à bono te retrahat, et adversus Dei legem impellat. Cætera omnia constanter et sine murmure exequi debes.

3. Gratitudo debitum respicit ob acceptum beneficium. Nihil autem magis præstandum, quâm beneficij æstimatio; si non ex rei magnitudine, saltem ex animo, et affectu donantis. Tum jugis beneficii memoria necessaria est, quæ semper animo hæreat. Gratiam referre nequit, nisi qui meminit: et qui meminit, jam refert. Hoc non exigit opes, non operam, non felicitatem; in promptu omnibus est. Ut desint vires, nunquam deerit voluntas, quâ

rependere etiam Regibus potes. Cùm ab aliquo accipis beneficium, hilaris accipe, et gaudium profitere, quod sit danti manifestum; ut numeris sui fructum capiat. Justa letitiæ causa est, laetum amicum videre; justior, fecisse. Qui grâte beneficium accepit, qui libenter et benignè, primam ejus pensionem solvit. Nunquam voluit gratus esse, qui beneficium tam longè projectit, ut extrâ conspectum sit. Qui illud extollit, qui se negat gratiam referre posse, jam reddidit. Qui fastidiosè accipit et negligenter, parvi facere illud videtur. Qui vix indicat se sensisse, vix labia dedit, ingratior est, quâm si taiceret. Vir bonus, dum accipit beneficium, de reddendo statim cogitat. Quid enim tam contra officium, quâm non reddere quod acceperis? Nec mensurâ pari, sed uberiori reddendum; sicut terra suscepta semina majori cumulo restituit. Caye tamen, ne in gratiæ relatione nimiùm festines. Quidam, cùm aliquod munuscum missum est illi, aliquid subindè intempestivè remittunt, et se nihil debere testantur. Rejiciendi hoc genus est, cùm munus munere subitò expungis.

CAPUT XXV.

DE VERITATE, EJUSQUE USU. SIMPLICITAS LAUDATUR. ACTUS FIDELITATIS.

4. In omni sermone, gestu, et scriptura, aliisque signis externis veritas sit. Non decet Christianum hominem labium mendax. Muliebre vitium et plementum est, aliud pectore claudere, aliud ore pro-

ferre. Vir generosus res simpliciter enuntiat prout sunt : non exaggerat, non amplificat, non decipit, non simulat, verborumque ambages et involucra devitat. Simplicia verba veritas simplex amat. Vult nuda videri; quia innocens est. Qui vero mentitur aut fallit, rem duplice sermone obscurat, ut lateat. Odit lucem qui male loquitur, sicut qui male agit. Cave itaque, ne ut vestitum, sic sententiam habeas, aliam domesticam, aliam forensem : ne in fronte ostentatio sit, intus veritas occultetur. Ab hoc vitio abhorret ipsa natura. Pueros vide, nondum ratione utentes. Mendacium inter prima probra objiciunt ; et quamvis levitate quādam assumant, tamen insitā judicii rectitudine dabant. Qua in re Dei providentiam admirari oportet, quae virtutes animo inserit, sine quibus vita et societas stare non possunt. Omnium autem perniciosissimum est mendacium vitae. Nam si omnem sermonis falsitatem abominaris, tanquam sublimi animo indignam ; cur ipse mendacium esse, et vivere non formidas ? Magna res est, unum hominem agere.

2. Simplicitas, parum hominibus cognita virtus, tantæ est dignitatis, ut ea Deus magnoperè delectetur : nam *cum simplicibus sermocinatio ejus* (1). Simplex enim ille et integerrimus cùm sit, simplices esse vult animas, quæ ad se convenient. Est autem simplex, qui in varia non abit : qui sine duplicitate et hypocrisi tamē se exteriorū exhibet, qualis interiorū est : qui proprios defectus, cùm fert occasio, candidē et sincerē fatetur : qui malitiā parvulus est, et omnem politicam agendi rationem detesta-

(1) Prov., iii, 32.

tur : qui non exclusa prudentiæ circumspectione, fidem in omnibus esse arbitratur, malum de nemine suspicatur : qui stultus apud homines videri non refugit, ut sit sapiens apud Deum : qui ab omni multiplicitate alienus, simplici intentione Deo placendi, cuncta operatur. Quid turbaris erga plurima, infelix astutia ? Unum est necessarium ; ut ad eum pervenias, qui unus et simplicissimus est. Nunquā pertinges ad metam, si dupli graderis viâ.

3. Fidelitas, inter maxima et præcipua humani generis bona, colenda est : hâc enim sublatâ tollitur usus commerciorum, dissolvitur amicitia, foedera dissociantur, universa Respublica perturbatur. Rara tamen et ista est, ac ferè mundo incognita virtus. Passim accusant humanam perfidiam tot ad contractus adhibiti testes, tot stipulationum firma menta, tot interpositæ industriae : quæ nihilominus vix sufficient, ut firma maneat pacta et conventa. Adeò plerique sordidi sunt, ut sanctior sit illis quæstus quam fides. O turpem humano generi publicæ fraudis ac nequitiae confessionem ! Nemini creditus sine teste, sine sponsore : et tutius in tabulis, quam in animi sacrariori, fidem custodiri arbitramur. Cæterū vir fidelis quounque opus promissum constanter exequitur, commissa sibi secreta nemini pandit, datam fidem etiam hostibus servat, ipsamque regnis ac vitæ præfert. Tarde quidem promittit, quia celeri sponsioni celerem incumbere pœnitentiam novit : sed si semel spopondit, non fallit, non violat, nisi forte rerum status mutetur, aut peccandi periculum incidat. Neminem obligat promissio, quæ non potest sine scelero adimpleri.

CAPUT XXVI.

DE AMICITIA. QUIBUS OFFICIS SIT COLENDA. PRÆCEPTA
QUÆDAM, AD MUTUAM CONVERSATIONEM PERTINENTIA.

1. Nihil magis ad humānam vitam necessarium quām amicitia; nihil commodius, nihil jucundius. Ea est mutua duorum benevolentia, in virtute fundata, et bonorum communicationi conjuncta. Quantum hoc bonum est, ubi præparata sunt pectora, in quæ tūto secretum omne descendat; quorum conscientiam mīnūs quām tuam timeas: quorum sermo sollicitudinem leniat, sententia consilium expediat, hilaritas tristitiam dissipet, conspectus ipse delectet? Quid dulcius, quām hominem habere, cui confiteri non timeas si quid deliqueris; cuius vel solus occursus prospicat tibi? Minuta quædam animalia cùm mordent non sentiuntur: adeò tenuis est illis et fallens in periculum vis; tumor indicat morsum: idem tibi eveniet in boni amici conversatione, non deprehendes, quemadmodū, et quando tibi prospicat; profuisse deprehendes. Vera autem esse amicitia nequit, nisi reciprocus interveniat amor: sed amare principalius est, quām amari; atque ideò benevolentia pro fundamento statutur, redamatio connotatur. Vera item amicitia est, et Christi glutino copulata, quam non utilitas rei familiaris, non sola corporalis præsentia, non mendax obsequium, non fallax adulatio, sed Dei timor, et divinarum studia

litterarum conciliant. Solida in malo amicitia esse non potest.

2. In eligendo amico magna cautio adhibenda, juxta illud quod vulgus ait; multos salis modios simul edendos esse, ut amicitiae munus expletum sit. Sunt autem quatuor in eo probanda, cum quo inire amicitiam cupis. *Fides*, res difficillima, cuius sola ferè umbra in terris reperitur; ut te et tua ei tutò committas. *Intentio*; ut amicitia finem honestum habeat, et res divina non transeat in turpitudinem. *Discretio*; ut scias quid præstandum illi, quid ab eo petendum. *Patientia*; ut paratus sit animus, quæcumque adversa pro amico sustinere. Hæc cùm in illo probaveris, explorare insuper debes, prioribus amicis quomodo usus sit: nam talem in te futurum sperabis, qualem cæteris se præbuit. Fidus amicus vivus thesaurus est, magnâ servandus curâ; magno, si pereat, fletu lugendus. Beatus es, si tales habes, qui te diligat, non tuas opes, non mensam, non ingenium: qui errantem corrigat, cadentem sublevet, currentem adhortetur. Similem illi non invenies, quacunque cœli ambitus pateat. Multi sunt, qui dicuntur amici: eorum qui verè sint, paucissimi numerantur. Nemo alterum gratis amat. Qui se spectat, qui res externas sibi pro fine proposuit, verus amicus non est. Tamdiù te diligit quamdiù utilis ei fueris. Sublata mensa deficit; atque ut cœpit, sic desinet. Vera amicitia ibi maximè deest, ubi creditur abundare.

3. Sicut Medicus, carissimum sibi ægrotantem curaturus, nec ferro, nec igni parcit; ita erga amicum correctione indigentem te gerere debes, liber-

rimè, audacter, constanter, nihil negligendo, aut dissimulando. Damnabile est obsequium, per quod vitia foventur. Sit autem admonitio secreta, adsit ei omnis suavitas, careat omni verborum acerbitate. An aliquis tibi in amicitiam recipiendus sit, diù delibera: cùm placuerit fieri, toto illum pectore admitte; tam liberè cum eo loquere, quam tecum. Ita quidem vivere debes, ut nihil illi committas, nisi quod inimico committere possis: sed quia interveniunt quædam, quæ consuetudo fecit arcana, omnes curas cum amico, omnes cogitationes misce. Quidam, que solis amicis committenda sunt, obviis narrant, et in quaslibet aures quicquid urit exonerant: alii etiam carissimorum conscientiam refor- midant, et intrà pectus omne secretum premunt, nec sibi quidem credituri, si fieri posset. Utrumque vitium est, et omnibus credere, et nulli, sed alterum honestius, alterum tutius. Quod si cupis sine periculo cum omnibus loqui, id facile assequeris; non occultando, que feceris, sed nihil faciendo, quod velis occultum esse.

4. Affinis amicitiae est affabilitas, quæ humanam conversationem moderatur; in qua servanda modestia est, servandum silentium. Multa decet audire virum probum, pauca loqui. Vitiosum est, velle potius sciri, quam scire; cognosci, quam alias cognoscere; proprias merces inutiliter prodigere, quam sibi alienas comparare. Assuescere oportet eorum cum quibus vivis verbis et moribus incompositis: et quia multi multa loquentur falsa, inepta puerilia, nihilque ad rem pertinentia, hæc prudenter dissimulabis. Animi abjecti, ac muliebris

est, cum iis dumtaxat versari velle, qui cedant, applaudant, et adulentur. De te rebusque tuis parciūs loquere: tuæ sententiæ ne pertinaciter inhæreas, et à verbis elatis abstine, quæ auctoritatem et magisterium sapiant. Cum quidpiam contra decorum occurrit tibi, in te regressus te ipsum interroga, an et tu tali vitiolabores: tum ex omnibus quæ audis et vides, aliquid semper ad tuum profectum exerce. Benè tecum agitur, si ex alieno peccato tuum emendas.

5. Cum tibi aliquid occurrit insolitum, inopinatum, et ab usu, tuæ patriæ abhorrens, ne id continuò reprehendas: nam levis animi indicium est, aliena mirari, et ridere, et suo servire municipio. Res aestimandæ prout sunt, non ut videntur. Vulgus omnia estimat ex novitate, difficultate, artificio, raritate, pompâ, rumore, et extrinseco appara- tu: sapiens intrinsecum rei pretium, et honestatem respicit; eaque omnia spernit, quæ plebs insana admiratur. Quidquid acciderit, penes te est, ut fructum ex eo capias. Noli te coarctare, et limi- tare proventum tuum. Licet tibi personam obducere, et actores fabulæ imitari. Illi dum flent, non dolent; dum emunt, non possident; jubent sine imperio, objurgantur sine vindicta, objurgant sine ira: agunt, scilicet, alienam vitam. Utinam et tu sic in aliorum societate te geras, sine affectu, et proprietate! Magnum theatrum mundus est, in quo tot histrioñes, quot homines sunt. Cura au- tem, ut, quantum fieri potest, spectator sis, non actor fabulæ. Qui spectaculum sui in scena exhibent, laborant; qui spectant, rident et delectantur.